

Tesalonaika thofroh husyuk gontwat

Porr dwandfakhato htafmot

Barkof kfo nuhas mrokfom

Taun Tesalonaikathu sioshu bok met yindarim fak mmotamom Jisas Kraisrhu nia yibon yihar rhuyuk nefm. Wommn kfo memooum, “Nungothet Jisasrhu yihar bi niamatr asor bi nd yiharn bi tohwonom.” Tesalonaika sios inji duka mmomoum. Ndnettn Por Sailas Timotirom ndar kfo nuhas gontwat wandfakhato htafmomt.

Porr kfo memor, “Nd yihar tor yuhre riyorhwor, tafi mfnahrmor. Nd yihar brbo rhu hanyrahr htirahkomm tuhan yindarim nhai tu yifo nefm naruhatm. Yimam mumiwa kanjo tamoh nefm be nafura bofurarahm. Htirahko buha wom yimar tohruharn nhai yima mrokfom wanyruhatr. Lokfot yak tuhafruhartn Kraisrhu yufat nhai rorhu yimbhindangm wanykfot, be tu hti dbnot thurahrr.”

Porr kfomorm Bro Nkifrarhu yakitohhato krhopa titaneft. Rorhu dukeft duka memor, tu Porrom niwa kanjo Tesalonaika Kristenm inji nakfot. Turoh tire hingrnahato tamohm yakkfot. Nhai rhu hhrekkfot. Yo womroh hingrnefm hti dukahato hingrna nhokfot.

**Bro Nungothetrhu yihar tor
yuhre riyorhwor**

(Sapta 1–2)

¹ Nom Por, Sailas, Timotironomn ndar gontwat wandfewunomko niko taun Tesalonaika sioshu tuhan yindariko. Niko nmoh Bro Yifemri Nungothet Jisas Kraisr pno frtkafwa tuhan yindariyeko, nikompno ndar gontwat htefiwunomt.

² Nmoh Bro Yifemri Nungothet Jisas Kraisr ayak marnya bomarnya-kahtfk, nikmoh yima yuhum mirhurahmko.

Tesalonaika thofm nhai krhopam hti yakrmihato Kraisr myafphonirmomr

³ O, yinouroko, niko Kraisr yakitohwa nmbuhat dukahato yiha yiha nom Bro Nkifrar kfo bruttna yindhorkfot. Niko Kraisr bi mhik trpakni twanhi-wukomr. Mhik trpakni-hato tuko nayakitohhato tuko nayak marnya nayak marnyewa nmbuhat bi hifa miyakitohaknitkomt. Ndnett n nom Bro Nkifrar kfo bruttna yindhор-neft nhai mrokfot. Ndt dborior neft newunom.

⁴ Niko Kraisr hikhato tohwohat, nhai be rpahtet krhopam yimam hikahmko. Wonk wonk krhopam yahukatmko yima yuhum nur finy suhnitmko. To niko nhai krhopam hti yakrmihato Kraisr myafphonikah-komr. Nhai. Bi riyakitohakmohat, to be kakitoh twanho hanitkomr. Ndnett n nom nom kongrigesnm-pno yishoft, niko kfo tndh yindhор htfaswonomko. Kfo kangnomm, “Tesalonaika thofm nhai krhopam hti yakrmehato Kraisr myafphonikahmr. Nhai. Kakitoh kihwomr.”

Tamoh tamoh nefm Bro Nkifrar bi hti hasiwurm

⁵ Niko yekwa krhopam nhai be sfno nd krhopam yakkahkomm. Nhai. Niko Bro

Nkifrarpno rim tohnita nmbuhatpno yimam hti namburhato krhopam yahukatmko gumuha muh thunitko. Tamoh tamoh nefm Bro Nkifrar bi hti hasiwurm. Niko rorpno rim tohnita nmbuhatpno krhopam yekwohat, nhai mrokfom. Kto Bro Nkifrar king yufat yakhato ndar bbinysofti met yindarim yakitoh thombat, rorn yakitohrahrko.

⁶ Nd niko krhopam hi hasiwa yimam tawo Bro Nkifrarn hirahrm krhopam. Ndhtet nayet yimam Bro Nkifrar tu hti nhta marnyahato tawo krhopam henyeft, ndt tu dborioh neft narahr.

⁷ To nd niko hatoh hasiwa krho nmbuhat yak thurahrt. Yak thuhato nhai wom krho yima yuhum rhuruhatm. Be rhu mmorahko. Nikomi nom inji na bugarahrnom. Bro Nungothet Jisasri rorhu tu bbuka nanyjaret mounmotm moun yuhat kah funeftpno yawihneruha yiha, tot nd yiha Bro Nkifrar nd neft narahrt.

⁸ Yo nd yiharn fitoh fitoh yimam Bro Nkifrar riyak htaphato nhai nmoh Nungothet Jisasrhu gut-nius mrokfom hikkahmm, nd yihar Bro Nkifrar afo htiwonrahrm.

⁹ Be nd yiha Bro Nkifrar yak tndohhato yak tuhaf thoft, to be inji nndo krhopa yakyuk tkit bebtn toh nkifranirahm. Nhai Bro Nungothet Jisasrpno brbo rorhu bro nuka nanyjareftpno tohruhatm. Be inji nndo toh nkifranirahm.

¹⁰ Nd Bro Nkifrarhu bro yiharn Jisasr niahato nd ror hiket yimam kfo yindhorphato bro yufat hirahmr. Niko to inji buga yindhorphahkomm. Bro Nkifrar nompno hingrnamo hingrneft, nom nikmoha yi pthamohat, wufak marnya-mokomt. Ndnettyn yindhorphahkomm.

Tesalonaika thofroh toh bmta nmbuhat duka-hato Bro Nkifrapno kfo bruttnamom

¹¹ Nom nd Jisasr bro yufat yakruha yiha dukahato nmoh Bro Nkifrar yiha yiha kfo bruttnewunomr. Kfo bruttna kangnom, “O Bro Nkifraye, nd Tesalonaika thofm ni nakuyakmotnm hikwomn. Ndnett rroh yima yuhum wathu bmtakahtnm ninhu dukefrn hikrahm. Nd Tesalonaika Kristenm kangm, ‘Be ninrpa ahikkahnomn be dborioh nefrpam anom.’ Ndnett kangnom, wathu bmtakahtnm be dborioh nefrpam naruharn hti yindhorrahnm.”

¹² Nom inji inji kfo bruttnewunomko Bro Nkifrapno. Nikmoh yufam kfo bruttnetmn nmoh Bro Nkifrari Nungothet Jisas Kraisr yak marnyarahfko. Yak marnyaruhatfko niko inji htihato Jisasrhu yufat yuta hagrha yindhorrahkomt, tawo ror inji htiruharko yuta hagrha yindhorrahrko.

2

Nkifra boririfhu mrokfot hamuhtfa nngrajohruha yimar mfnahrahr

¹ Bar yinouroko, nmoh Nungothet Jisas Kraisrhu niahato nmoh yak nhafohhato mnahtiruha nmbuhat kfo ptha nuhasruhanko.

² Ka wom yimam kfo memomko, “Nmoh Nungothet Jisasrhu yihar bi asor niamotr bi nd yiharn bi tohwonom.” Ndhtet mrokfom wanuknom, niko bi mirahko ariwany fohtasakkahnomn bok dukefm ayak-nom. Wom yimar kfo kangr, “Porr Bro Nkifrarhu Yafothat mthu nawohmottr nd mrokfot

kfo pthamotrt wanymo-nomt.” O wom yimar kfo kangr, “Bro Nkifrarhu mrokfom kfo ptha hany-hato kfo pthamort.” O wom yimar kfo kangr, “Nom htayuk gontwatin nd mrokfot rhumot.” Na kfiwanko ndhtet ndhtet mrokfom warihtaft-wakomm. Mirahko awiyaknomm.

³ Mirahko ndhtet ndhtet yimaroh mrokfom awany yakionomm. Wawanyko, nd yihar mfnah thombat nhai be mfnah furaruhatr. Nhai. Tafi Bro Nkifrarhu mrokfot riyakhtafhato rorhu boririfhu mrokforoh hanyjbor nungrajoheft bi mfnahrrrott htirronomt. Afo nd neft kmi kmi rhuraht. Nd neft rhuni, ee tfit Bro Nkifrarhu mrokfom hamuhfa nngrajohruha yimar mfnahrahr. Hel yihato mitaprhoruhr, ndr afo mfnah-rahr.

⁴ Nd yimar nia thombat, htirah-komr tamoh tamohm yimam tth kaugohato kfo tatiwam nhai htiruhatr yimam ndmn kfo tatoneft. Rorpar bro-rahr. Rorpar brohato Bro Nkifrarhu temperr, Jerusalemr yorhwar, ror rim fknenehato rorn rim rhruharn kfo mirahr, “Na asoya Bro Nkifraya.”

⁵ Na nikompno tohhato nd kfomo mrokfome ka nhai duka hanykahkomm?

⁶ Bi wanymoko, nd yimarhu fnahna yuhat afo wom yimarn toh rafiwurt. Bro Nkifrar bi kfo htamort nd yimarhu fnahna yihar. Nd yiharne fnahnerahr.

⁷ Nd nom kfiwa yimar, tor be afo yukr yukr rorhu hingrneft hingrnewurt. Nd Bro Nkifrarhu boririfhuthu hanyjborna-neft to frohmn yifemwamt? To nd yimar. Afo ndar yiham be afo yukr yukr rorhu hingrneft hingrna hanitrt. Kto nd rorhu nia yuhat toh rafiwra yimar

Bro Nkifrar riyak htafrahrr ee fnahnerahr.

⁸ Fnahne thombat, rorhu hingrneft tafont hingrnarahrt. To tfit kto to tor bi Nungothet Jisasr. Ror tfit fnahnerahr. Rorhu nuka nanyjareft rpatt hnerahrt. Nd nuka nanyjareftpno nieruharn nd yimarhu bbukeft nd yiha yohniraht. Rorhu tnge yahsha wunaruhatrr mibatinirahr.

⁹ Nd yimar nia thombat, Satanrhu bbukeftpno nierahr. Satanrhu bbukeftpno nieruharn yimam yuwi frnheh bonhehrahrm. Yuwi wonk wonk mirakerm hingrna nheh hakuruhatrm yimam hti haku-ruhamn mirahm, ka tu Bro Nkifrarhu bbukeftpno hingrnewurm.

¹⁰ To nd hel yita yihotat bi tohet yimamn inji yuwi frnheh bonheh hakurahrm. Nd yimam nhai Bro Nkifrarhu yafothet mrokfot hikhato yakrmom. Nhai. Bro Nkifrarhu yafothet mrokfot kurmomt. Ndnetmn hel yihota yuhat tohrahm.

¹¹ Mirahm ka tfit yima yuhum sinyahato Bro Nkifrar hikrahnom. Nhai. Bro Nkifrar rroh yima yuhum hta krhoruhatrnd yima yuhum nhai sinyaruhatm. Tfit ndwom yimarhu frnhehyuk mrokforoh dukeftn yima yuhum mwofnnirahm.

¹² Ndnettn nd yimam nhai Bro Nkifrarhu yafothet mrokfot hikrfomt, be nd fasoh fasoh nefroh yindhoreftn ftohm, bro kotkfot tonihato yaktatirahrm.

Bro Nkifrarhu yakyukkomn bi tur kfo htamorko

¹³ To bar yinouroko, Nungothet Jisasr tu hti yindhor mifworko. Bingot nd nikmoh nrfa htiyakneft Bro Nkifrar bi duka htangotmort. Bi

duka hta memor, "Tukanhu Yafothaye thu hmbri-hato bi nanhu yufatn rhurahm. Yo nanhu mrokfot bi yakruhamtn hikrahmt." Nd nmbuhatpno nom niko dukahato Bro Nkifrar kfo yindhorkfot.

¹⁴ Nd gutnius mrokfot nom hany pthamot, nd yuhatn fakmorko. Bro Nkifrarhu dukeft memor, yakrhoyanmn nanopno tohhato nmoh Nungothet Jisas Kraisr bro yufat yakhato kfo yindhор thom-bat, niko rpat nd bro yufat yakrahko.

¹⁵ Ndnettn yinouroko toh bmtakfot. Nd Bro Nkifrarhu kfo yirmoh mrokfom nom nikompno yi kfo pthamom yo kfo hta mrokfom gontwaye htamom yak hikkfot.

¹⁶⁻¹⁷ Nom kfo bruttna kangnom nmoh Nungothet Jisas Kraisri Bro Nkifrar, nmoh Bro Yifemr, dukefm ahekahrko athu bmtarko. Inji ana-kahtko tamoh nefm naneft hifa hifa narahkomm yo mrokfo pthaneft ptha marnyarahko. Yo nom tohwa toheft htitarnt hti yindhorwornom. Yo hti yuhuwafwornom. Yuhuwafhato nmoh yima yuhum yiha yiha thu bmte-wurnom. Ndnett-nomn Jisasm toh gari kangnom, yakniruharnom be rorpno mtih nkifranirahnom.

Hhreket yimam mrokfom hekfot *(Sapta 3)*

3

Wakfo bruttnatwakmnom

¹ Yinouroko, wuroh mrokfom tfit kforuhanko. Wakfo bruttna-twakmnom. Wakfo bruttnakahtko ndar Nungothet Jisasm toh gari kangnom, yakniruharnom be rorpno mtih nkifranirahnom. Kmi kmi

thu yufurniruhatt kmi kmiroh tuhan yindars wanyhato hikrahmt niko wanyhato hikmo kanjo.

² Yo womt nom ndar mrokfot hatonitanom wakfo bruttnatwakmnom. Bok yimam nhai Jisas Kraisrhu mrokfot hikkahmt. Wakfo bruttnakahtkmnom nd fasoh fasoh yimam finji naneft Bro Nkifrar toh raforahrnom.

³ To Nungothet Jisasr, ror nhai yafhokahrko. Ror yiha yiha kakitoh kihworko. Rorn tpim habokknaruuharko yo toh raforahrko Satanr tamoh nefm naneft.

⁴ Nd nom kfo hayuk mrokfom wany yakiohato hikwatkomm nom inji htihato kangnom, “Awi nd nom kfo hemo mrokfom hikmomm yo tfit gontwat htewa kfo tebos mrokfom hikrahmm.” Nom niko htihato dukewa dukefr Nungothet Jisasrn nd dukefr kahukrnom.

⁵ Nom kangnom, Bro Nungothetr yima yuhum ahikahtrk wahti hiktawakomt Bro Nkifrarhu yima yuhur nikompno yorhwa yuhati yo Kraisr krhopam titahemo yuhat.

Hingrnaneftu mrokfot

⁶ Yinouroko, nmoh Nungothet Jisas Kraisrhu yufatpno kfo pthiwanko. Ndar Jisasrhu mrokfot hikwa nmoh womm nhai nom yahuka kfo hta mrokfom hikkahmm. Be hwes rhut nahasiwum yonmari yiham. Mirahko nd yimampno brbo ainyom.

⁷ Nom nikompno tohmohat, nmoh toh ruheft bi htimokomt. Nd yuhatn niko hikkfot. Nom nikompno tohmohat, nom nhai hwes rhut nar-moanom.

⁸ Nom nhai marimonom, “Wom yimarhu yesht
be brio rimak furahato yerahnomt.” Nhai. Mar-
ufat rim htahato yeshrim fakmounomm. Yo
tunom nhai rhu furarmoanom. Yifung mar, yi-
fung mar tunmoh rhu nmbuhat dukahato hingr-
namounom.

⁹ Nom Bro Nkifrarhu hingrna yimanomn, nom
nikmoh tirmn rhurmonom tamoh yeshriyenm o
tamohm. To nhai. Nom nhai inji narmonom. Nom
memonom, “Tunmoh tire hingrnahato yeshrim
yak y eruha-nomn rom inji htiruharn rom nd
yuhat hingrna hikrahm.”

¹⁰ Nom nikompno tohmohat mro-kfom
hemonomko. Kfo memonomko, “Yimar nhai
hingrnakah, nd yimar mirahm yimam yeshrim
tamohm ahe-nomr.”

¹¹ Bi wom mrokfom wanyak-monom, kfo
memom, nikmoha tom wom yimam rhu
fura bofurewum. Nhai wom hingrnerefem
hingrnawonkahm. Be rhu fura bofura hasohato
womroh mrokforoh yihom hiyauyak mhiyauyak
nefrpat buriwum.

¹² Ndhtet neft niwa yimam Jisas Kraisrhu yu-
fatpno bi kfiwa, nd yimam warhu digrhato turoh
rhu nmbuhat dukahato hingrnakfot.

¹³ Bar yinouroko, mirahko dborioh nefm na
hanyhato tfit buha mhhrehkato amyafhinomm.

¹⁴ Fitoh yimar nhai hikkahrm ndar gontwat
htewa mrokfom, hti hikak marnyahato nd yi-
marpno rhu nafiny juha. Turpar rhu mmbra-
finyruharn dukarahr.

¹⁵ To tfit kfi-wanko, ndhtet nayet yimar mi-
rahko wom nndoh yima furam kanjo ahtikah-

nomr, fasoh nefm ananomr o tng bebm akfonomr. Nom nhai be kfo mekahnomko, "Inji wanatwako." Nhai. Nd yimar niko tuko rpat Jisasr hikwa yimayeko. Be kfo kangnomko, "Ndhtet net yimar mrokfom hekfot."

Wuroh mrokfom

¹⁶ Bro Nungothetr harhuworr tu noh hmbre yima yuhur. Tamohtet tamohtet nefm yo tamohtet tamohtet yihar rorn nd nohmbre yima yuhur ahitwarko Nungothet Jisasr atoh natwi bugatwarko.

¹⁷ Na Pora niko dukahato nanhu kfo yindhorkfot htefiwant. Nd kfo yindhorkfot na tukanhu tire htewant. Kmi kmimpno yitwa gontwam yo be yimaro yufampno yitwa gontwam na be ndhtet mrokfo nmbuharpam nanhu tire wandfaf hakutwanm.

¹⁸ Nmoh Nungothet Jisas Kraisr ayak marnya bomarnyatwarko.

**Bro Nkifrarhu Mrokfot
The New Testament in the Alambbak language of
Papua New Guinea
Nupela Testamen long tokples Alambbak long Niugini**

copyright © 2003, 2004 Wycliffe Bible Translators, Inc.

Language: Alambbak

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2011-07-22

PDF generated using Haiola and XeLaTeX on 18 Mar 2025 from source files
dated 31 Aug 2023
e543742f-8ea0-5b0f-8d98-b42933b0c997